

四庫全書

子部

欽定四庫全書

冊府元龜卷七百八十四 宋王欽若等撰

總錄部

壽考

洪範五福其一曰壽詩人之述黃者易象之紀大耋曰
其事也蓋夫民稟天地之中以生其札瘥天闕中道而
殞者不可勝數矣乃有鮐背覲齒皤皤華皓而筋力靡
耗精爽不衰以至飾巾待期啓手無恨此乃康寧終命

盡其天年者歟傳之所載八十九曰耄百年曰期頤人之享年及於耄期誠足貴矣三代而下悉用論次其有百歲以上至數百歲者豈特稟異氣哉

周太公望呂尚者為太師佐武王平商而王天下封於營邱蓋太公之卒百有餘年

衛武公年九十五警於國人曰苟在朝者無謂我老而舍我也必恭恪於朝夕以警我聞一言志誦納之以訓道

敏邱人齊人也桓公見之曰叟言年幾何對曰臣年八十三公曰美哉壽也

老子周守藏室之吏也百有六十餘歲或言二百餘歲以其修道而養壽也

榮啓期年老白首衣弊服鼓琴樂孔子問曰先生年老而窮何樂也啓期曰吾有三樂天生萬物以人為貴吾得為人一樂也人生以男為貴吾得為男二樂也人生命有傷天吾年九十餘是三樂也貧者士之常死者人

之終居常以守終何不樂乎

唐祖魏人也年九十餘會齊楚約攻魏祖謂魏主曰老臣請西說秦令兵出可曰敬諾遂約車遣之見秦遽發兵救之

漢東園公角里先生綺里季夏黃公四人年皆八十有餘鬚眉皓白衣冠甚偉惠帝為太子卑辭安車因使辯士固請來以為客

班壹避地於樓煩當孝惠高后時以財雄邊年百餘歲

以壽終

伏生者

伏生名勝

濟南人故秦博士也孝文欲求能治尚書

者天下無有聞伏生能治召之是時伏生年九十老不能行乃詔太常掌故鼂錯往受之

張蒼為丞相免後口中無齒食乳女子為乳母妻妾以百數嘗孕者不復幸年百餘歲迺卒

馮唐文帝時為車騎都尉景帝立以唐為楚相武帝即位求賢良舉唐唐時年九十餘不能為官迺以子遂為

郎

申公楚人武帝遣使迎之至問治亂之事時年八十餘
轅固生武帝時以賢良徵固已九十餘

公孫宏武帝時為丞相御史大夫年八十終丞相位
劉辟彊為光祿大夫守長樂衛尉時已八十矣

蘇武為典屬國年八十餘神爵二年病卒

趙充國為後將軍甘露二年薨年八十六

夏侯勝為太子太傅年九十卒官

韋賢為丞相致仕八十二薨孫賞為大司馬車騎將軍
亦年八十餘以壽終

嚴君平蜀人卜筮於成都年九十餘遂以其業終蜀人
愛敬之

貢禹為光祿大夫上書曰犬馬之齒八十一乞骸及身
出居鄉里死無恨矣

後漢樊重湖陽人貧至巨萬縣中推為三老年八十餘
終

郭伋為大中大夫卒時年八十六

嚴光建武十七年復特徵不至年八十終於家

郭丹為司徒坐考隴西太守鄧融事無所據策免卒於家年八十七

伏恭為司徒乞骸骨年九十

第五倫為司徒上疏乞身卒年八十餘

馮魴為執金吾建初三年以老病乞身帝許之其久為

五更詔魴朝賀就列侯位元和二年卒時年八十六

禮天

子父事老
兄弟五更

魯恭為司徒以老病策免卒年八十一

郭躬習小杜律為郡法曹掾用法平年九十五卒

袁湯為太尉以災異策免卒年八十六

薛包為侍中稱疾賜告歸年八十餘以壽終

王堂為汝南太守免歸家年八十六卒

李充為左中郎將年八十以為國三老安帝時嘗進見
賜以几杖卒於家

樓望少習嚴氏春秋為左中郎將年八十永元十二年卒於官

蔡順以至孝稱舉孝廉不能遠離墳墓遂不就年八十終于家

楊統位至光祿大夫年九十卒

楊厚為侍中病免歸年八十二卒於家

胡廣為太傅錄尚書事時年已八十而心力克壯盛宏之荆

州記曰菊水出穰縣芳菊被涯水極甘香谷中皆飲此水上壽百二十七八十者猶以為夭太尉胡廣所患風

疾休沐南歸嘗飲此水後
疾遂瘳年八十二薨也

冷壽光年可百五十六歲行容成公御婦人法容成公能修補

導之事取精於元牝其要谷神不死守生養氣者也髮白復黑齒落復生御婦人之術謂握固不瀉還精補脛

也嘗屈頸鵲息鵲音居妖反詩曰有集惟鵲注曰鵲尾似雉長尾白鬚髮盡白而色理如三四十時老死於江陵

計子勲者不知何郡縣人皆謂數百歲

唐廩魯女生者皆與華佗同時唐廩道亦眉張步家居里落若與相及死於鄉里不其縣魯女生數說顯宗時

事甚明了議者疑其時人也董卓亂後莫知所在

折像廣漢人能通京氏易好黃老卒年八十四

李邕為太尉策免年八十餘卒於家

廖扶汝南人州郡公府辟召皆不就號北郭先生年八十終于家

王真上黨人年且百歲視之面有光澤似未五十者

李尤少以文章顯為樂安相年八十三卒

法真前後四徵終不降居友人郭正稱之曰可謂百世

之師者矣乃共刊石頌之號曰元德先生年八十九中
平五年以壽終

檀敷補蒙令以郡守非其人棄家去年八十卒於家

董扶學圖讖為蜀郡屬國都尉去官還家年八十二

張儉建安初徵為衛尉不得已而起儉見曹氏逆德已

萌乃闔門懸車不豫政事歲餘卒於許下年八十四

華佐一名專舉孝廉辟大尉府皆不就曉養性之術年

且百歲而猶有壯容時人以為仙

甘始東郭延年封君達三人皆方士壽皆百餘歲及二百歲

陳寔為太邱令中平四年年八十四卒于家

楊彪為司徒免年八十四黃初六年薨

趙岐為太常年九十餘建安六年卒先自為壽藏

壽藏謂塚

壙也稱壽者取其久遠之意也猶如壽宮壽器之類塚在今荊州古郢州城中也

園李札子產

晏嬰叔向四像居賓位又自畫其像居主位為贊頌

吳祐為河間相因自免歸家不復仕躬灌園蔬以經書

教授年九十八卒

張皓為司空年八十三卒

魏田豫為衛尉稱疾乞遜位拜太中大夫食卿祿年八

十二薨

管寧累徵不至正始二年卒年八十四

胡昭居陸渾山中嘉平二年公車特徵會卒年八十九

拜子纂郎中

焦先字孝然隱者也亡時年八十九矣

一曰可百餘歲乃卒

扈累字伯重京兆人初平中山東人有青牛先生者字
正方客三輔年似五六十者人或親識之謂其已百餘
歲矣累隨正方游學嘉平中年九十病亡

張珩養志不仕學兼內外正始元年戴雋之鳥巢珩門
陰珩告門人曰夫戴雋陽鳥而巢門陰此凶祥也乃援
琴歌詠作詩二篇旬日而卒時年一百五歲

蜀孟光為大司農嘗直言無所迴避為代所嫌後坐事
免官年九十餘卒

來敏以語言不節前後數貶削後主以敏為執慎將軍
欲令以官重自警戒也年九十七景曜中卒

杜瓊字伯瑜少受學於仕安精究安術後為太常年八
十

吳士燮為交趾太守在郡四十餘歲黃武五年年九十
卒

呂岱為大司馬九十六卒子凱嗣遺令殯以素棺䟽巾
布禭葬送之制務從約儉凱皆奉行之

晉太宰安平王孚泰始八年薨時年九十三

王祥字休徵為太保疾篤著遺令訓子孫曰夫生之有死自然之理吾年八十有五啓手何恨

劉寔為司空薨時年九十一

鄭袤拜司空固辭以疾就第薨年八十五

石鑒元康初為太尉年八十餘克壯慷慨自遇若少年時人美之

顏含為光祿勳致仕二十餘年年九十三卒

何琦養志衡門不交人事前後徵辟皆不就年八十二卒

許孜元康中郡察孝廉不起巾褐終身年八十餘卒于家

黃泓魏郡人為慕容暉太史靈臺諸署統暉敗以老歸家善天文祕術年九十七卒

崔遊為氏池長以病免就家拜郎中卒年九十三

續咸貞素好學為并州從事中郎没于石勒年九十七

死于石季龍之世

鮑靚為南海太守嘗見仙人陰君授道訣百餘歲卒

戴作吳末為臺吏後託病不仕有神術年八十餘所占驗者不可勝紀

陳訓歷陽人為諫議大夫去職還鄉善占候年八十餘卒

丁潭為光祿大夫卒年八十

譙秀巴西人遭蕭敬叛亂避難宕渠川中鄉人宗族馮

依者以百數秀年八十衆人以其篤老欲代之負擔秀
拒曰各有老弱當先營救吾氣力自足堪此不以垂朽
之年累諸君也後十餘年卒於家年九十餘

范粲陳留外黃人為太宰中郎後稱疾不出不言三十
四年卒年八十四

郭荷雒陽人明究群籍特善史書張祚徵為太子友上
疏乞還年八十四卒

公孫永襄平人隱平郭南山年餘九十操尚不虧

單道開好山居後入羅浮山獨處茅茨蕭然物外年百餘歲卒于山舍

宋纖不應辟命張祚徵為太子友遷太傅不食而卒年八十二

後秦姚興時西胡梁國兒為鎮北將軍封平輿男年八十餘卒

宋傅隆為太常博學多通特精三禮卒年八十三

營浦侯遵考高祖族弟元徽初卒年八十二

顧琛元徽中為員外常侍中散大夫卒年八十六

劉鎮之閒居京口未嘗應召後以左光祿大夫徵不就
元嘉二年年九十餘卒于家

王元謨為南豫州刺史加都督性嚴刻少恩薨年八十

一

裴松之字世期為國子博士致仕卒年八十

南齊徐伯珍隱居九嵎山家甚貧窶兄弟四人皆白首
相對時人呼為四皓建武四年卒年八十四

王琨為侍中卒年八十四

沈鱗士字雲禎吳興武康人隱居不仕卒年八十六

梁袁昂為司空侍中薨年八十

賀瑒為步兵校尉領五經博士天監九年遇疾卒于館
時九十

孫謙為零陵太守天監九年以年徵為光祿大夫既至
高祖嘉其清潔甚禮異焉每朝見猶請劇自効高祖笑
曰朕當使卿智不使卿力十四年詔曰光祿大夫孫謙

清慎有聞白首不怠高年舊齒宜加優秩可給親信二十人并給杖謙年逾九十強壯如五十者每朝會輒先衆到公門十五年卒于官時年九十二高祖為舉哀甚悼惜之

顧思遠鍾離人新渝侯映為北徐州刺史徵還思遠挺义行部伍中映見甚老使人問對曰年一百一十二歲凡七娶有子十二死亡畧盡今唯小者年已六十又無孫息家闕養之是以行役映大異之召賜之食食兼於

人簡其頭有肉角長寸許遂命後車載還都謁見天子
與之言往事多異所傳擢為散騎侍郎賜以俸宅朝夕
進見年一百三十卒又普通中北侵攻穰城城內有人
年二百四十歲不復能食穀唯飲曾孫婦乳聞文帝命
勞之賜以束帛

荊州上津鄉人張元始年一百一十六歲膂力過人進
食不異至年九十七方生兒兒遂無影將亡與人告別
乃至山林樹木處處履行少日而終時人以為知命湘

東王愛奇重異留其枕

後魏元法僧為太尉始安王薨年八十三

裴安祖河東聞喜人州辟主簿年八十三卒于家

長孫嵩太武時為太尉北平王薨年八十

長孫道生太武帝時為司空上黨王薨年八十二

嚴稜太武帝時為中山太守有廉清之稱年九十卒于家

寇讚為南雍州刺史讚在州十七年甚獲公私之譽年

老表求致仕真君九年卒年八十六

王憲為并州刺史及遷京師以憲元老特賜錦綉布帛
錦綵環羞禮膳獻文帝天安初卒年八十九

李崇獻文帝時為北幽州刺史卒年八十一

刁雍晉人為特進征南大將軍太和八年卒年九十五
高允太和三年為鎮南大將軍領中書監高祖詔允議
定律令雖年漸期頤而志識無損猶心存舊職搜考史
書談說舊事了無所遺十一年卒年九十八

尉元太和十三年為司徒以年老致仕十七年七月元疾篤高祖親幸省疾八月元薨時年八十一

羅結代人為侍中年一百七歲精爽不衰後詔聽歸老賜太東川以為居業并為築城即號曰羅侯城年一百二十歲卒

梁祚為散令清貧守素不交勢貴年八十七太和十二年卒

王琚闡人也高祖時累遷散騎常侍養老於家常飲牛

乳如處子太和二十年卒時年九十

游明根高祖時為五更太和二十三年卒於家年八十

二

爾朱代勤高祖末假寧南將軍除泗州刺史卒年九十

一

新興公丕仕歷六世垂七十年位極公輔景明四年薨
年八十二

傅永為平東將軍光祿大夫熙平元年卒年八十三

北齊侯莫陳相為太傅汾州刺史武平中薨於州年八

十三

斛律金為太師咸陽郡王天統三年薨年八十

後周寇雋為驃騎將軍保定三年卒時年八十三高祖
嘆惜之

熊安生字植之武帝宣政元年徵拜露門學博士下大
夫其時年已八十餘尋致仕卒於家

樂遜為東揚州刺史卒年八十二

張羨為司城中大夫卒年八十四

姚僧坦為太醫下大夫至隋開皇三年卒時年八十五

隋沈重吳興武康人仕梁為太常卿後周大象二年來

朝京師開皇三年卒年八十四

裴政開皇中為襄州總管卒官年八十九

楊慶字伯悅開皇中為儀同三司年八十九終於家

庾季才為太史中大夫藝術精通後免職以半祿歸第

所有祥異使人就家訪焉仁壽三年卒年八十八

公孫景茂大業初為淄州刺史卒官年八十七

柳儉大業末以上大將軍卒於家時年八十九

敬肅字宏儉大業末以前潁川郡丞終於家時年八十

唐裴矩貞觀初為民部尚書年八十而精爽不衰

歐陽詢貞觀初歷太子率更令加銀青光祿大夫宏文館學士封渤海縣男年八十餘卒

虞世南字伯施為秘書監後表請致仕優制許之仍授銀青光祿大夫宏文館學士祿尋卒年八十一

褚亮為員外散騎常侍宏文館學士後致仕卒年八十

八

邱和為特進貞觀十一年卒年八十六

傅奕貞觀中為太史今年八十餘卒於官

李百藥貞觀中任宗正卿卒時年八十五

張俊喬貞觀中為國子祭酒致仕卒年八十三上為之

輟朝三日贈禮部尚書陪葬昭陵謚曰康

趙宏智高祖朝為國子祭酒崇賢館學士卒時年八十

三

張道鴻少遊名山得服食之術後居人間每餌金丹時
年一百四十六歲

甄權精曉藥術為天下之最初仕隋為祕書省正字後
稱疾免貞觀十七年權年一百三歲太宗幸其家視其
飲食訪以藥性因授朝散大夫

孫思邈京兆華原人也自云開皇辛酉歲生至今年九
十三矣詢之鄉里咸云數百歲人話齊周間事歷歷如

眼見以此參之不啻數百歲人矣永淳元年卒

李客師衛國公靖之弟為冠軍大將軍總章二年卒時年九十

許敬宗高宗朝為中書令又冊拜太子少師久之抗表乞骸骨詔聽致仕加特進俸祿如舊及薨年八十一

丘行恭為右武侯大將軍請致仕拜光祿大夫卒年八十賈敦實為懷州刺史永淳初以年老致仕及病篤子孫迎醫視之敦實曰未聞良醫能治也不肯服藥垂拱四

年卒時年九十餘

高智周永淳中為左散騎常侍卒年八十二

劉仁軌光宅初為文昌左相同鳳閣鸞臺三品卒年八十四

王及善為內史聖曆二年拜文昌左相旬日薨年八十二

唐休璟景雲中為朔方道行軍總管卒時年八十六

蘇珣為太子賓客檢校詹事以年老致仕卒年八十一

葉法善世為道士法善少傳符錄自高宗則天中宗睿宗殆五十年數詔入禁中法善生隋大業之丙子死於開元之庚子凡一百七歲

嚴善思為左散騎常侍年八十五卒善思父延為徐州長史子向為太常員外卿皆年八十五卒向兄宙為趙郡司馬長向十歲向卒時宙並無恙

張果不知何許人也時人傳其有長生祕術自云數百歲矣

王友貞懷州河內人也為太子中舍人員外制置元宗
在東宮表請禮徵之以年老竟辭疾不起年九十餘卒
王希夷徐州滕人也孤貧好道常餌松栢葉及雜花散
元宗東巡勅州縣以禮徵召至駕前時年已九十六令
中書令張說訪以道義宦官扶入宮中與語甚悅授國
子博士聽致仕尋壽終

李元愷博學善天文口未嘗言之年八十餘壽終

王知遠為道士年一百十六歲

潘師正為道士師事王知遠永淳元年卒年九十八

司馬承禎字子微河內溫人為道士事潘師正傳其符錄及辟穀導引服餌之道卒于王屋山時年八十九

信安郡王禕天寶二年十月薨年八十餘元宗聞而痛惜之

孫逖父嘉之進士擢第又以書判拔萃授蜀州新津縣主簿歷曲周襄邑二縣令以宋州司馬致仕卒時年八

十二

賀知章開元中為祕書監歸會稽壽終年八十六

裴道慶為右僕射年九十餘終於位

王縉為平章時元載用事縉卑附之元載得罪連坐貶
處州刺史德宗登極徵為太子賓客東郡留守卒時年
八十三

邱為為散騎常侍致仕年八十餘而繼母尚無恙

于邵貞元中終於江州別駕年八十一

郭子儀為尚父太傅中書令建中二年薨年八十五

蕭昕為太子少傅兼禮部尚書致仕貞元七年卒年九十一

常倫貞元中為太子少師致仕卒時年八十三

嗣滕王湛然貞元中卒年八十四

歸崇敬貞元中為兵部尚書致仕卒時年八十八

張萬福貞元二十一年以左散騎常侍致仕元和元年卒年九十萬福自始從軍至卒祿食七十餘年未嘗一日病

日病

趙宗儒為太子太傅拜疏請老詔以司空致仕卒年八十七

趙昌元和六年自工部尚書為華州刺史候辭於麟德殿時年八十餘趨拜輕捷占對詳明憲宗退而嘆異宣命宰臣密訪其頤養之道以奏焉

閻濟美為祕書監以年邁懸車上表陳乞授工部尚書致仕寶曆元年歿于家年近九十

裴向以吏部尚書致仕享年八十贈太子少保

張正甫以吏部尚書致仕卒年八十三

柳公度善攝生年八十餘步履輕便位至光祿少卿

柳公權為太子少師卒年八十八

王起為山南東道節度使在鎮二年以老疾求代不許
卒於鎮時年八十八

後唐錢鏐為尚書令吳越國王堯時年八十一

馬縞長興四年為戶部侍郎縞時年已八十及為國子
祭酒八十餘矣形氣不衰

許寂授工部尚書致仕卜居于維時寂已年高精彩猶
健沖淡寡言時獨語竒怪可怪人莫知其際卒時年八
十餘

晉盧損為祕書監拜章辭位乃授戶部尚書致仕退居
潁川時李鱗年將八十善服氣導引損以鱗之遐壽有
道術酷慕之仍以潁川逼城市乃卜居陽翟立隱舍誅
茅種藥山衣野服逍遙於隱几之間出則柴車鴻氍自
稱具茨山人晚年與同遊五六人於大隗山中古宮觀

址疏泉鑿坯為隱所誓不復出山氣多寒被病而卒時年八十餘齒髮不衰而有壯容

周宏知濬父延緘左武衛大將軍致仕年九十餘卒

李建崇歷河陽邢州兵馬留後漢初入為右衛大將軍年逾七十神氣不衰建崇始自代北事後唐武皇至是四十餘年前後所掌兵麾下部曲多至節鉞零落殆盡唯建崇雖位不及藩屏而康強自適以至期耄太祖即位授左監門衛上將軍廣順三年春卒贈黔南節度使

晉蕭愿為太子賓客愿唐宰相做之曾孫也做入相接
賓之次愿為兒童之戲做謂客曰子豈敢得位而喜所
幸奕世壽考吾今又有曾孫在目前矣愿年七十餘其
母猶在一門壽考人罕及者

楊凝式為太子少師分司於維廣順中表求致政尋以
右僕射得請顯德初改左僕射又改太子太保並懸車
以疾薨于第年八十五

冊府元龜卷七百八十四

欽定四庫全書

冊府元龜卷七百八十五 宋王欽若等撰

總錄部

守道 知足

守道

孔子曰士志於道而恥惡衣惡食者未足與議也然則
卷懷昏亂養素立樊不為利回不為物忤杜門謝絕陋
巷晏然或琴書以自娛或樵蘇而不爨鱗餌不可誘汙

君莫能臣安貞居嘗誓志終老者良足多矣亦有逃榮
避地篤學俟時不厯當塗之門獨樂先王之道時主欽
慕風聲自遠至或濯纓仕籍忘懷得喪託庇彊宗棲心
恬薄端默以自守耿介而不渝確乎之操於茲可尚蓋
聞其風者足使貪夫廉懦夫有立志者焉

孔子為魯大夫公山弗擾以費畔召子欲往

弗擾為季氏宰與陽

虎共執季桓子而召孔子子路不悅曰末之也已何必公山氏之

也
之適也無可之則止
子曰夫召我者而豈徒哉如有

用我者吾其為東周乎

興周道於東方故曰東周

又佛肸以中年畔

子之欲往也如之何子曰然有是言也不曰堅乎磨而

不磷不曰白乎涅而不緇

磷薄也涅可以染皂言至堅者磨之而不薄至白者染之

於涅而不黑喻君子雖在濁亂濁亂不能汙

吾豈匏瓜也哉焉能繫而不食

匏瓠也言匏瓜得係一處者不食故也吾自食物當東西南北不得如不食者物係滯一處

又楚聞

孔子在陳蔡之間使人聘之蔡大夫謀曰孔子賢者今

楚大國也孔子用於楚陳蔡用事大夫危矣於是乃

相與發徒役圍孔子於野孔子講誦弦歌不衰子路愠

見曰君子亦有窮乎孔子曰君子固窮小人窮斯濫矣

濫溢也君子固亦有窮時但孔子知弟子有愠心召子

不如小人窮則濫溢為非路而問曰詩云匪兕匪虎率彼曠野率循也言非兕吾

道非邪吾何為於此子路曰意者吾未仁耶人之不我

信也言人之不信吾意者吾未知耶人之不我行也言

不使通行而困窮孔子曰有是乎由譬使仁者而必信

者豈以吾未智乎安有伯夷叔齊使智者而必信安有王子比干子路出

子貢入見孔子曰賜詩云匪兕匪虎率彼曠野吾道非

耶吾何為於此子貢曰夫子之道至大故天下莫能容

夫子夫子盍少貶焉孔子曰賜良農能稼而不能為穡

種之為稼斂之為穡言良農能播種之未必能斂獲之良工能巧而不能為順言良

工能巧而已不能每順人之意君子能修其道綱而紀之統而理之而

不能為容今爾不修爾道而求為容賜而志不遠矣子

貢出顏回入見孔子曰回詩云匪兕匪虎率彼曠野吾

道非耶吾何為於此顏回曰夫子之道至大故天下莫

能容雖然夫子推而行之不容何病不容然後見君子

夫道之不修也是吾醜也夫道既已大修而不用是有

國者之醜也不容何病不容然後見君子孔子欣然而

笑曰有是哉顏氏之子使爾多財吾為爾宰

宰主財者也為汝主

財言志之同也

孔子在衛王孫賈問曰與其媚於奧寧媚於竈

何謂也

王孫賈衛大夫奧內也以喻近臣竈以喻執政賈執政者欲使孔子求眈之微以世俗之言感

動子曰不然獲罪於天無所禱也

天以喻君子拒之曰如獲罪於天無所

禱於又曰富而可求也雖執鞭之士吾亦為之

富貴不可求而

得之當修德以得之若於道可求者雖執鞭賤職我亦為之

如不可求從吾所好

者古人之道又子貢曰有美玉於斯韞匱而藏諸求善賈而

沽諸韞藏也匱匱也謂藏諸匱中子曰沽之哉沽之哉

我待賈者也又冉有謂子貢曰夫子為衛君乎為猶助也衛君

者謂輒也衛靈公逐太子蒯瞶公薨而立孫輒後晉趙鞅納蒯瞶於戚衛石曼姑帥師圍之故問其意助輒

否子貢曰諾吾將問之入曰伯夷叔齊何人也曰古之

賢人也曰怨乎曰求仁而得仁又何怨夷齊讓國遠去終於餓死故問

怨邪以讓為仁豈有怨乎出曰夫子不為也父子爭國惡行孔子以伯夷叔齊為賢且仁故

知不助衛君明矣又孔子疾病子路使門人為臣孔子嘗為大夫故子路欲

使弟子行其臣之禮病間曰久矣哉由之行詐也無臣而為有臣

吾誰欺欺天乎少差曰間言子路久有是心非今日也且予與其死於臣

之手也無寧死於三子之手乎無寧寧也三子門人也就使我有臣而

死其手我寧死於弟子之手乎且予縱不得大葬君臣禮葬予死於道路乎

就使我不得此君臣禮葬有二三子在我寧當憂弃於道路乎又孟子曰孔子之去齊

接淅而行去魯曰遲遲吾行也去父母國之道也可以

速而速可以久而久可以處而處可以仕而仕孔子也

蘧伯玉衛大夫邦有道則仕邦無道則可卷而懷之卷而

懷之謂不與時政
柔順不忤於人

顏子名回魯人也當世亂居於陋巷一簞食一瓢飲人

不堪其憂回也不改其樂孔子賢之

當亂世安陋巷者不用於世窮而樂

道也故孔子賢之也

曾點字皙

皙曾參父

侍孔子孔子曰言爾志點曰春服既成

冠者五六人童子六七人浴乎沂風乎舞雩詠而歸

莫春

者季春三月也春服既成衣單袷之時我欲得冠者五六人童子六七人浴於沂水之上風涼於舞雩之下歌

詠先生之道歸於夫子之門

孔子喟然嘆曰吾與點也

善點之能知時也

曾子名參寢疾病

疾謂疾困

樂正子春坐於牀下

子春曾參弟子

曾

元曾申坐於足

元申曾參之子

童子隅坐而執燭

隅坐不與成人並

童

子曰華而睨大夫之箒與

華畫也箒謂牀下也說者以睨為刮節目

子春曰

止

以病困不可動

曾子聞之瞿然曰呼

呼震憊之聲

曰華而睨大夫

之箒與曾子曰然斯季孫之賜也我未之能易也元起

易箒

未之能易已病故也

曾元曰夫子之病革矣不可以變幸而

至於旦請敬易之

言夫子者曾子親沒之後齋嘗聘以為卿而不為也革急也變動也幸覲

也曾子曰爾之愛我也不如彼

彼童子

君子之愛人也以

德成已細人之愛人也以姑息

息猶安也言苟容取安也

吾何求哉

吾得正而斃焉斯已矣

斃休也

舉扶而易之反席未安而

沒

言病雖困猶勤於禮

澹臺滅明字子羽武城人孔子弟子也既已受業退而修行行不由徑非公事不見卿大夫

公皙哀字季次齊人也孔子曰天下無行多為家臣仕於都唯季次未嘗仕

漆雕開字子開孔子使開仕對曰吾斯之未能信

仕進之道

未能信者
未能究習

孔子說

善其志
道深

柳下惠魯人為士師

士師典獄之官魯士師也

三黜人曰子未可以

去乎曰直道而事人馬往而不三黜

苟直道以事人至之國俱當復三黜

枉道而事人何必去父母之邦

墨子宋人名翟弟子公上過語墨子之義於越王悅之

謂公上過曰子之師苟肯至於越請以故吳之地陰江

之浦書社三百以封夫子

二十五家為社
七千四百家也

公上過往於

墨子墨子曰子觀越王能聽吾言用吾道乎公上過曰

殆未能也墨子曰不唯越王不知翟之意雖子亦不知
翟也若越王聽吾言用吾道翟度身而衣量腹而食比
於賓萌未敢言士賓客越王不聽吾言不用吾道雖全
越以予我吾無所用之不聽不用而受其國是非義翟
也何必越雖中國可矣

孔伋字子思孔子孫也魯繆公亟見於子思曰古千乘
之國以友士何如子思不悅曰古之人有言曰事之云
乎豈曰友之云乎

孟子曰子思之不悅也豈不曰以位則子君也我臣也何敢與君友也以

德則子事我者也奚可以與我友千乘之君求與之友而不可得也而況可召與

孟子為卿於齊出弔於滕王使蓋大夫王驩為輔行王

驩朝暮見反齊滕之路未嘗與之言行事

孟子嘗為齊卿出弔滕君

蓋齊下邑也王以治蓋之大夫王驩輔行輔副使也王驩齊之諂人也有寵於王後為右師孟子不悅其為人雖與同使而行未嘗與之言行事不願與之相比也公孫丑曰齊卿之位不為小

矣齊滕之路不為近矣反之未嘗與之言行事何也曰

夫既或治之予何言哉

孟子曰夫人既有自謂治行事我將復何言哉

顏觸齊人也見齊宣王王曰觸前

使之

觸亦曰王前宣

王不悅左右曰王人君也觸人臣也王曰觸前觸亦曰
王前可乎觸對曰夫觸前為慕勢王前為趨士欲使觸
為趨勢不如使王為趨士王忿然作色曰王者貴乎士
貴乎對曰士貴耳王者不貴王曰有說乎觸曰有昔者
秦王攻齊今有敢去柳下季壟五十步而樵采者死不
赦今曰有能得齊王頭者封萬戶侯賜金千斤由是觀
之齊王之頭曾不若死士之壟也齊王默然不說左右
皆曰觸來觸來大王據千乘之地而建千石鐘萬石簾

天下之士仁義皆來役處辯知並進莫不來語東西南
北莫敢不來服萬物無不備具而百姓無不親附今夫
士之高者乃稱匹夫徒步而處農畝下則鄙野監門閭
里士之賤也亦甚矣觸對曰不然觸聞古大禹之時諸
侯萬國何則德厚之道得貴士之力也故虞舜起農
畝出於野鄙而為天子及至商湯之時諸侯三千當今
之世南面稱寡人者乃二十四由此觀之非得失之
策與稍稍誅滅滅亡無族之時欲為監門閭里安可

得而有乎哉是故易傳不云乎居上位未得其實以喜
其為名者必以驕奢為行倨慢驕奢則凶必從之是故
無其實而喜其名者削無德而望其福者約無功而受
其祿者辱禍必渥故曰矜功不立虛願不至此皆幸樂
其名而無其實德者也是以堯有九佐舜有七友禹
有五丞湯有三士自古及今而能虛成名於天下者無
有也是以君王無羞亟問不愧下學士故成其道德而
揚功名於後世者堯舜禹湯周文王是也故曰無形者

形之君也無端者事之本也夫上見其源下通其流至
聖明學何不吉之有哉老子曰雖貴必以賤為本雖
高必以下為基是以侯王稱孤寡不殺是其賤之本與
夫孤寡者人之困賤下位也而侯王以自謂豈非下
人而尊貴士與夫堯傳舜舜傳禹周成王任周公旦而
世世稱曰明王是以明乎士之貴也宣王曰嗟乎君子
焉可侮哉寡人自取病耳及今聞君子之言乃今聞細
人之行願請受為弟子

漢申公魯人也少與楚元王交俱事齊人浮邱伯受詩
元王薨子郢嗣立申公傳太子戊戊不好學病申公申
公媿之歸魯退居家教終身不出門復謝賓客獨王命
召之乃往

嚴彭祖字公子東海下邳人也為宣帝博士至河南東
郡太守以高第入為左馮翊廉直不事權貴或說曰天
時不勝人事君以不修小禮曲義亡貴人左右之助經
義雖高不至宰相願少自勉強彭祖曰凡通經術固當

修行先王之道何可委曲從俗苟求富貴乎

翼奉字少君東海下邳人治齊詩與蕭望之等同師望之施之政事而奉博學不仕好律歷陰陽之說元帝徵待詔官者署時平昌侯王臨以宣帝外屬侍中稱詔欲從奉學其術奉不肯與言後為諫大夫

孫寶字子嚴以經明為郡吏御史大夫張忠辟寶為屬

欲令授子經更為除舍

除為修飾掃除也

設儲峙

謂豫備器物也音又紀切

寶自劾去忠固還之心內不平後署寶主簿寶徙入舍

祭竈請比鄰忠陰察怪之使所親問竇前大夫為君設

除大舍子自劾去者欲為高節也今兩府高士俗不為

主簿子既為之徙舍甚說說讀曰悅何前後不相副也竇曰

高士不為主簿而大夫君以竇為可一府莫言非言大夫以

為竇通可為主簿耳府中之人又不可以為不當也士安得獨自高前日君男欲

學文而移竇自近文禮書也禮有來學義無往教道不可誣

身誣何傷且不遭者可無不為況主簿乎言士不遭遇知已則當屈

辱無所不為也忠聞之甚慙後終於大司農

揚雄哀帝時為郎待詔時丁傅董賢用事諸附離之者或起家至二千石時雄方草太元有以自守泊如也

桓譚當王莽居攝篡弒之際天下之士莫不競褒稱德美作符命以求媚譚獨自守默無言後終於六安郡丞

後漢孔子建魯國人也少遊長安與崔篆友善及篆仕

王莽為建新大尹

莽改千乘國曰建新郡守曰大尹

嘗勸子建仕對曰

吾有布衣之心子有衮冕之志各從所好不亦善乎道

既乖矣請從此辭遂歸終於家

包咸字子良會稽曲阿人也習魯詩論語王莽末去歸鄉里於東界為赤眉賊所得遂見俘執十餘日咸晨夜誦經自若賊異而遣之後終於騎都尉

杜撫字叔和犍為武陽人也少有才受業於薛漢後歸鄉里教授沈靜樂道舉動必以禮後為公車令

馮衍更始時為立威將軍更始使鮑永安集河北永以衍領狼孟長屯太原光武即位遣使者招永衍不肯降審知更始已歿乃共罷兵幅巾降於河內帝愆衍等不

時至永以立功得贖罪遂任用之而衍獨見黜永謂衍曰昔高祖賞季布之罪誅丁固之功今遭明主亦何憂哉衍曰記有之人有挑其隣人之妻者挑其長者長者詈之挑其少者少者報之後其夫死而取其長者或謂之曰夫非罵爾者耶曰夫在人欲其報我在我欲其罵人也夫天命難知人道易守守道之臣何患死亡衍後為曲陽令

仇覽字季智陳留考城人也入太學時諸生同郡符融

有高名與覽比宇賓客盈室覽嘗自守不與融言融觀
其容止心獨竒之乃謂曰與先生同郡壤鄰房牖今京
師英雄四集志士交結之秋雖務經學守之何固覽乃
正色曰天子修設太學豈但使人游談其中高揖而去
不復與言後融以告郭林宗因與融齎刺就房謁宿林
宗嗟嘆下牀為拜覽初為本縣主簿後歸鄉里卒

楊賜常退居隱約不答州郡禮命後辟大將軍梁冀府
非其好也出除陳倉令因病不行公車徵不至連辭三

公之命後拜尚書令數日出為廷尉賜自以代非家法
言曰三后成功惟殷于民臯陶不與焉蓋吝之也尚書曰伯夷降典折民惟刑禹平水土主名山川稷降播種農殖嘉穀三后成功惟殷于民言臯陶不預其數者蓋恥之
遂固辭以特進就第

魏邴原自遼東歸曹公辟為司空掾原女早亡時太祖愛子蒼舒亦沒太祖欲求合葬原辭曰合葬非禮也原之所以自容於明公公之所以待原者以能守訓典而不易也若聽明公之命則是凡庸也明公焉以為哉太

祖乃止魏太子為五官中郎將天下向慕賓客如歸而
原獨守道持常自非公事不妄舉動太祖徵使人從容
問之原曰吾聞國危不事冢宰君老不奉世子此典制
也於是乃轉五官長史

晉庾敳字子嵩為吏部郎是時天下多故機變屢起敳
嘗靜默無為

陳袁樞字踐言家世顯貴資產充足而樞獨處率素
傍無交往端坐一室非公事未嘗出遊榮利之懷淡如

也王僧辯平侯景鎮京城衣冠爭往造請樞獨杜門靜居不求聞達後為丹陽尹

後魏胡方回為中書侍郎司徒崔浩及當時朝賢並愛重之清貧守道以壽終

崔模字叔軌長者篤厚不營榮利頗為崔浩輕侮而守志確然不為浩屈後位至征東將軍

北齊盧熙裕襲兄爵為固安伯虛淡守道有古人之風為親表所敬重

後周于謹字思敬河南維陽人性沉深有識量略窺經史尤好孫子兵書屏居閭里未有仕進之志或有勸之者謹曰州郡之職昔人所鄙台鼎之位須待時來吾所以優游鄉邑聊以卒歲耳太宰元天穆見之嘆曰王佐才也後為太傅大宗伯

隋房彥謙為司隸刺史時隋政漸亂朝廷靡然莫不變節彥謙直道守常介然孤立為執政者之所嫉出為涇陽令

李禮成字孝諧年七歲與姑之子蘭陵太守滎陽鄭顥
隨魏武帝入關顥母每謂所親曰此兒平生未嘗回頭
當為重器耳及長深沉有行檢不妄通賓客釋褐著作郎
周受禪拜平東將軍散騎常侍于時貴公子皆競習弓
馬被服多為軍容禮成雖善騎射而從容儒服不失素
望

裴矩煬帝時為右光祿大夫于時皇綱不振人皆變節
左翊衛大將軍宇文述內史侍郎虞世基等用事文武

多以賄聞唯矩守常無臧穢之響以是為世所傳

李文博為薛道衡所奏為司隸從事于時朝政浸壞人多臧賄唯文博不改其操論者以此貴之遭離亂播遷不知所終

唐虞世南於隋大業初累授祕書郎遷起居舍人時兄世基當朝貴盛妻子被服擬於王者世南雖同居而躬履勤儉不失素業

竇威字文尉扶風平陵人隋太傅熾之子也沉深有器

局博覽群言多所通涉家風尚武諸兄並以武功致位
通顯皆哂威所為而終不改也隋內史令李德林舉其
有文學釋褐祕書郎

趙宗儒自中書侍郎平章事罷授右庶子退居守道奉
朝請而已德宗聞而嘉之遷吏部侍郎召見勞之曰知
卿閒六年故有此拜曩者與先臣並命尚念之耶因俯
伏流涕

盧紹廣明初遷給事中大寇犯邊避地江左雖生計屢

空而端默自守未嘗以事干侯伯人所難者紹力行之
後唐李愚昭宗在鳳翔汴軍攻蒲華愚避難東歸雒陽
時衛公李德裕孫道古在平泉崔野愚往依馬子弟親
採梠負薪以給朝夕未嘗干人

知足

夫知足不辱知止不殆老氏之訓也故大雅明哲之士
乃能察盈虛之理蹈卑約之戒使其任不踰量居常遠
禍克保身吉而終無祇悔焉至乃辭婚當途移疾避位

用清白為家法故不益田廬謂贏餘為自苦故不須富
貴逮乎妨賢竊祿之媿發於話言懷田述志之樂形於
賦詠斯皆究易象知退之旨識天道虧盈之意寡欲易
足不伎不求內全節而無苟世間風而競勸其淑人之
令範歟

漢張良封留侯為太子少傅良言天下事甚衆乃稱曰
家世相韓及韓滅不愛萬金之資為韓報仇彊秦天下
震動今以三寸舌為帝者師封萬戶位列侯此布衣之

極於良足矣願棄人間事欲從赤松子游耳

赤松子
仙人也

劉德為宗正嘗持老子知足之計妻死大將軍光欲以女妻之德不娶畏盛滿焉

疏廣宣帝時為太傅廣兄子受為少傅在位五歲皇太子年十二通論語孝經廣謂受曰吾聞知足不辱知止不殆功遂身退天之道也今仕宦至二千石宦成名立不去懼有後悔豈如父子相隨出關歸老故鄉以壽命終不亦善乎受叩頭曰從大人議即日父子俱移病

移病

謂移書言病也

滿三月賜告廣遂稱篤上疏乞骸骨宣帝以其

年老皆許之詔賜黃金二十斤皇太子贈五十斤踈廣

踈受既歸鄉里日令家共具設酒食

日日設之也共讀曰供

請族

人故舊賓客相娛樂數問其家金餘尚有幾所趨賣以

共具

幾所猶言幾許也越讀曰足

居歲餘廣子孫竊謂其昆弟老人

廣所愛信者曰子孫幾及君時頗立產業基址

幾讀曰與今

日飲食費且盡宜從丈人所勸說君買田宅

丈人嚴莊之稱也故

親而老老者皆稱焉老人即以閒暇適為廣言此計廣曰吾豈老

詩不念子孫哉

詩感也音布內切

顧自有舊田廬

顧思念也

今子孫

勤力其中足以共食與凡人齊今復增益之以為贏餘但教子孫怠惰耳賢而多財則損其志愚而多財則益其過且夫富者衆之怨也吾既無以教化子孫不欲益其過而生怨又此金者聖主所以惠養老臣也故樂與鄉黨宗族共饗其賜以盡吾餘日不亦可乎於是族人說服

說讀曰悅皆以壽終

邴曼容養志自修為官不肯過六百石輒自免去

後漢馬援為伏波將軍封新息侯食邑三千戶援乃擊

牛醞酒勞享軍士

醞猶漚也音所宜反

從容謂官屬曰吾從弟少

游嘗哀吾慷慨多大志曰士生一世但取衣食裁足乘

下澤車

車行澤者欲短轂

御款段馬

款猶緩也言形段遲緩

為郡掾吏守

墳墓鄉里稱善人斯可矣致求盈餘但自苦耳當吾在

浪泊西里間虜未滅之時下潦上霧毒氣熏蒸仰視飛

鳶跼跼墮水中

鳶鷓也跼跼貌音都塚秦塚二切

卧念少游平生時

語何可得也今賴士大夫之力被蒙大恩猥先諸君紆

佩金紫且喜且慙吏士皆伏稱萬歲及軍還將至故人
多迎勞之平陵人孟異名有計謀於坐賀援謂之曰
吾望子有善言反同衆人邪昔伏波將軍路博德開置
七郡裁封數百戶今我微勞猥享大縣功薄賞厚何以
能常久乎先生奚用相濟異曰愚不及

張霸為會稽太守視事三年謂掾吏曰太守起自孤生
致位郡守蓋日終則移月滿則虧老氏有言知止不辱
遂移病

魏程昱為奮武將軍從太祖屢立功及天下漸平昱宗人奉牛酒大會昱曰知足不辱吾可以退矣乃自表歸兵閨門不出

晉羊祜為征南大將軍開府儀同三司嘗與弟琇書曰既定邊事當角巾東路歸故里為容棺之墟以白士而居重位何能不以盛滿受責乎疏廣是吾師也

南齊王秀之為晉平太守至郡暮年謂人曰此郡豐壤祿俸常充吾山資已足豈可久留以妨賢路上表請代

時人謂王晉平恐富求歸

丘靈鞠為尚書左丞世祖即位轉通直常侍領東觀祭酒靈鞠曰人居官願數遷使我終身為祭酒不恨也

梁陶季直初仕齊為尚書左丞遷建安太守為政清靜百姓便之梁臺建為給事黃門侍郎嘗稱仕至二千石始願畢矣無為久預人間事

江淹為散騎常侍左衛將軍嘗謂子弟曰吾本寒素不求富貴今之忝竊遂至於此平生言止足之事亦以備

矣人生行樂雖富貴何時吾功名既立正欲歸身草萊
耳

陳虞寄字次安官至戎昭將軍大中大夫卒前後所居
官未嘗至秩滿裁暮年數月便自求解退嘗曰知足不
辱吾知足矣

後魏裴宣為益州刺史家世以儒學為業嘗慕廉退每
嘆曰以賈誼之才仕漢文之世不歷公卿將非運也乃
謂親賓曰吾本閭閻之士素無當世之志直隨牒推移

遂至於此祿厚養親效不光國瞻言往哲可以言歸矣
因奉表求解世宗不許乃作懷田賦以叙心焉

北齊鄭述祖文宣天保初累遷太子少師儀同三司充
州刺史病篤乃自言之且曰吾今老兵一生富貴足矣
以清白之名遺子孫死無所恨遂卒於州

後周蕭太園梁簡文帝子也國亡於周為麟趾殿學士
太園深信因果心安閒放嘗言之曰拂衣褰裳無吞舟
之漏網挂符懸節慮我志之未從儻獲展禽之免有美

慈明之進如蒙北叟之放實勝濟南之徵其故何哉夫
閭閻者有優游之美朝廷者有簪珮之累蓋由來久矣
留侯追蹤於松子陶朱成術於辛文良有以馬況乎智
不逸群行不高物而欲辛苦一生何其僻也豈如知止
蕭然無累北山之北棄絕人間南山之南超踰世網面
川原而帶流水倚郊甸而抗平臯築蝸舍於踈林構環
堵於幽薄近瞻煙霧遠睇風雲藉纖草以蔭長松結幽
蘭而援芳桂仰翔禽於百仞俯泳魚於千尋果園在後

開牕牖以臨花卉蔬圃居前坐簷楹而看灌圃二頃以
供饘粥十畝以給絲麻侍兒五三可充絰織家僮數四
足代耕耘沽酪牧羊協潘生之志畜雞種黍應莊叟之
言獲菽尋汜氏之書露葵徵尹君之錄烹羔豚而分春
酒迎伏臘而候歲時披良書採至蹟歌纂纂唱烏烏可
以娛神可以散慮有朋自遠揚推古今田峻近至劇談
稼穡斯亦足矣樂不可支永保性命何畏憂豈若覺
足入絆申頸就羈遊帝王之門趨宰衡之勢不慮飄塵

之少選寧覺年祀之斯須萬物營營靡存其意天道昧
昧安可問哉嗟乎人生若浮朝露寧俟長繩繫景實所
願言執燭夜游驚其迅速耳百年幾何擊息曲拳四時
如流俛眉躡足出處無成語默奚當非直邱明所恥抑
亦宣尼恥之

隋梁睿字恃德初仕後周為柱國益州總管高祖受禪
自以周代舊臣久居重鎮內不自安屢請入朝於是徵
還京師及引見帝為之興命睿上殿握手極懽睿退謂

所親曰功遂身退今其時也遂謝病闔門自守不友當
時

韋世康以高祖開皇初為絳州刺史性恬素好古不以
得喪干懷在州嘗慨然有止足之志與子弟書曰吾生
因緒餘夙霑纓弁驅馳不已四紀於茲亟登衮命頻蒞
方岳志除三惑心慎四知以不貪而為寶處脂膏而莫
潤如斯之事頗為時悉今耄雖未及壯年已謝霜早梧
楸風先蒲柳眼闇更劇不見細書足疾彌增非可趨走

祿豈須多防滿則退年不待暮有疾便辭况孀春秋已
高溫清宜奉晨昏有關罪在我躬今世穆世文並從戎
役吾與世冲復嬰遠任陟岵瞻望此情彌切桓山之悲
倍深嘗戀意欲上聞乞終養禮未訪汝等故遣此及興
言遠慕感咽難勝弟報以事恐難遂於是乃止

于宣敏為奉車都尉嘗以滿盛之誡昔賢所重每懷靜
退著述志賦以見其志焉

唐本本文字景仁為中書令有勸其營產業者文本歎

曰南方一布衣徒步入關疇昔之望不過祕書郎一縣
令耳而無汗馬之勞徒以文墨致位中書今斯亦極矣
荷俸祿之重為懼已多何得更言產業乎言者太息而
退

李日知以玄宗先天元年轉刑部尚書罷知政事頻請
致仕許之初日知將有陳請而不與妻謀歸家而使左
右飭裝將出居別業妻敬馬曰家產屢空子弟名宦未立
何為遽辭職也日知曰書生至此已過本分人情無厭若

恣其心是無止足之日及歸田園不事產業但緝構池
亭多引後進與之談宴

冊府元龜卷七百八十五

欽定四庫全書

冊府元龜卷七百八十六 宋 王欽若等撰

總錄部

博學 多能

博學

夫學知乎不足廣業在勤友貴乎多聞孤陋為恥蓋夫
自強不息之士以好古博雅為念泛覽篇籍之困索隱
天人之際以至九流七略之奧諸子百家之言龜策歷

象之精微方伎術數之元妙史書蟲篆之叢脞聲樂鍾律之鏗鏘逮乎地理山經玄文釋典咸能探其幽蹟洞乎指趣始繇時習之利終成待問之名羣居之言必及於義專門之學自可名家仲尼所謂好古敏以求之者乃斯人之謂矣

漢司馬談學天官書於唐都

即律歷所云唐都者

受易於楊何

何字

叔元習道論於黃子

景帝時人謂之黃生

仕於建元元封之間愍學

者不達其意而師誨

誨惑也為習師法惑於所身

乃論六家之要指

六家謂陰陽儒
墨名法道也 位至太史公

司馬遷字子長其涉獵者廣博貫穿經傳馳騁古今上下數千載間位至太史

李尋治尚書與張儒鄭寬中同師寬中等守師法教授尋獨好洪範災異又學天文月令陰陽位至騎都尉

翼奉字少君博學不倦好律歷陰陽之占位至諫大夫
翟方進雖受穀梁然好左氏傳天文星歷其左氏則國
師劉歆星歷則長安令田終術師也

言劉歆及田終術二人皆受學於方

進位至丞相也

揚雄字子雲少好學不為章句訓詁通而已

詁謂博覽指也

無所不見而潭思渾天

潭深也渾天天象也

參摹而四分之

三折而四

分天之宿度甲乙也

極於八十一旁則三摹九据

据位也處也

極之七

百二十九贊亦自然之道也位至大夫

後漢王景少學易遂廣闕衆書又好天文術數之事沈

深多伎藝位至廬江太守

班固字孟堅年九歲能屬文誦詩賦及長遂博貫載籍

九流百家之言無不研究

九流謂道儒墨名法陰陽雜縱橫

所學無常

師不為章句大義而已位至大將軍中護軍

崔駰能通詩易春秋博學有偉才盡通古今訓詁百家之言善屬文少游太學與班固傅毅同師齊名位至長岑長

徐淑寬裕博雅好學樂道隨父慎在京師鑽孟氏易春秋公羊禮記周官善誦太公六韜位至度遼將軍

劉寬少學歐陽尚書京氏易尤明韓詩外傳星官風角

筭厯皆究極師法稱為通儒未嘗與人爭勢利之事後
為太尉

梁鴻扶風平陵人也受業太學家貧而尚節介博覽無
不通而不為章句

翟醜四世傳詩醜好老子尤善圖緯天文內厯筭位至
將作大匠

胡廣有雅才學究五經古今術藝皆畢覽之位至太傅
蔡邕少博學師事太傅胡廣好辭章術數天文位至左

中郎將

延篤從馬融受業博通經傳及百家之言能著文章有名京師位至京兆尹

劉洪篤信好學觀乎六藝羣書意以為天文數術探賾索隱鈎深致遠遂專心銳思

唐檀少遊太學習京氏易韓詩顏氏春秋尤好灾異星占位至郎中

任安字定祖少遊太學受孟氏易兼通數經又從同郡

揚厚學圖識究極其術時人稱曰欲知仲桓問任安又
曰居今行古任定祖安初仕州郡後徵辟皆不就

法真南郡太守雄之子好學而無常家博通內外圖典
為關西大儒辟公府舉賢良皆不就

公沙穆習韓詩公羊春秋尤銳思河雒推步之術位至
遼東屬國都尉

樊志張漢中南鄭人也博學多通隱身不仕

韓說博通五經尤善圖緯之學仕至江夏太守

樊英少受業三輔習京氏易兼明五經又善風角星筭

河雒七緯推步灾異

七緯者易緯稽覽圖乾鑿度坤靈國通卦驗是類謀辨終倫也書緯

璇璣鈴考靈耀刑德叔帝命驗運期受也詩緯推度灾記歷樞含神務也禮緯含文嘉稽命徵斗威儀也樂緯動聲儀稽耀嘉叶圖徵也孝經緯援神契鈞命決也春秋緯演孔圖元命苞文樞鈞運斗樞感精符合誠圖考異郵保乾圖漢含孽佑助期握誠圖潛潭巴說題辭位至光祿大夫

申屠蟠陳留外黃人也隱居精學博貫五經兼明圖緯後以博士徵不至

徐稚少為諸生學嚴氏春秋京氏易歐陽尚書兼綜風角

星官筭歷河圖七緯推步四察孝廉五辟宰府三舉茂
才

李固改易姓名杖策驅騾負笈追師三輔學五經積十
餘年博覽古今明于風角星筭河圖識緯仰察俯占窮
神知變位至太尉

賀純字仲真會稽山陰人少為書生博極羣藝徵拜議
郎數陳災異上便宜數百事多見省納遷江夏太守

周昕字大明少游京師事太傅陳蕃博覽羣書明于風

角善推災異

鄭玄少為鄉耆夫得休歸嘗詣學官不樂為吏父數怒之不能禁遂造太學受業師事京兆第五元先造通京氏易公羊春秋三統歷九章算術徵大司農不就

應劭字仲遠博學多識尤好事諸所撰述風俗通等凡百餘篇辭雖不雅世服其博聞位至袁紹軍謀校尉

魏樂詳字文載學左氏傳又善推步三五當高貴鄉公時授詔與太史興定律歷太守杜畿亦甚好學署詳文

學祭酒

蜀孟光字孝裕博物識古無書不覽尤銳意三史長於漢家舊典位至大司農

李謨字欽仲五經諸子無不覽該位至右中郎將

譙岍字榮始巴西克國人也治尚書兼通諸經及圖緯州郡辟請皆不應

譙周岍子也周字允南研精六經尤善書札頗曉天文潛識內敏為益州典學從事總州之學者後入晉拜騎

都尉

吳陸績字公紀容貌雄壯博學多識星歷筭數無不該覽位至偏將軍

王蕃字永元博覽多聞兼通術藝

蕃為後主所誅丞相陸凱上疏曰常侍王

蕃黃中通理知大和物

位至散騎中常侍

晉鄭冲覽博究儒術及百家之言仕魏為司徒時文帝輔政命賈克羊祐等分定禮儀律令皆先諮于冲然後施用

張華學業優博辭藻溫麗宏贍多通圖緯方伎之書莫不詳覽位至司空

虞喜字仲寧會稽餘姚人博學好古專心經傳兼覽識緯乃著安天論以難渾蓋以散騎常侍徵不起

劉殷弱冠時博通經史綜核羣言文章詩賦靡不該覽位至新興太守

索靖該博經史兼通內緯位至遊擊將軍

索統字叔徹燉煌人游京師受業太學博綜經籍遂為

通儒明陰陽天文善術數占候仕至郎中

黃沈魏郡人泓之父也善天文秘術泓從父受業精
妙踰深兼博覽經史尤明禮易性忠勤非禮不動

邵續字嗣祖朴素有志烈博覽經史善談理義妙解天
文仕至沁水令

杜夷字行齊博覽經籍百家之書筭圖歷緯靡不畢究
位至國子祭酒

范平字子安研覽墳索遍該百氏姚信賀邵之徒皆從

受業位至臨海太守

鮑靚字太元學兼內外明天文河雒書

宋徐廣字野民世家好學至廣尤精百家數術無不研覽後為秘書監性好讀書老猶不倦答禮問百餘條用於今世仕至中散大夫

梁顧協博極羣書於文字及禽獸草木尤稱精詳位至員外散騎常侍

庾承先潁川鄆陵人也弱歲受學於南陽劉虬強記敏

識出於羣輩元經釋典靡不該悉九流七略咸所正練
不就徵辟隱居而終

庾詵字彥實新野人也幼聰警篤學經史百家無不該
綜緯候書射並一時之絕初高祖起義署為西府記室
參軍

羊侃字祖忻雅愛文章博涉書記尤耽左氏春秋及孫
吳兵法

徐摛為皇太子家令兼掌管記高祖問五經大義次問

歷代史及百家雜說末論釋教摛商較縱橫應答如響
高祖甚嘉歎異

陳顧野王好學七歲讀五經知大旨長而遍觀經史精
記默識天文地理著龜占候蟲篆奇字無所不通位至
光祿卿

馬樞博極經史尤善佛經及周易老子義文帝徵為度
支尚書不應命

顧越字允南勵精學業不捨晝夜至於微言玄旨九章

七曜音律圖緯盡其精微歷北海安西相東王府參軍
及武帝撰制旨新義選諸儒在所流通遣越還吳敷揚
講義越遍該經藝深明毛詩傍通異義特善莊老尤長
論難位至大中大夫

孔奐數歲而孤為叔父虔孫所養好學善屬文經史百
家莫不通涉沛國劉顯時稱學府每共奐討論深相歎美乃
執奐手曰昔伯喈墳素悉付仲宣吾當希彼蔡君足下
無愧王氏所保書籍尋以相付位至宏範官衛尉卿

周確字士潛美容儀寬大有行檢博涉經史篤好玄言
位至都官尚書

徐孝克陵之第三弟也少好周易有口辯能談玄理既
長遍通五經博覽史籍後入隋為國子博士

後魏燕鳳字子章代人少好學博綜經史明習陰陽讖
緯位至鎮遠將軍

高謙之少以孝聞及長屏絕人事專意經史天文筭歷
圖緯之書多所該涉好文章留意老易位至國子博士

崔浩字伯淵清河人也文貞公玄伯之長子少好文學博覽經史玄象陰陽百家之言無不關綜研精理義時人莫之及位至侍中撫軍大將左光祿大夫

高允博通經史天文術數尤好春秋公羊位至光祿大夫

高祐博涉經史好文字雜說位至光祿大夫

孫紹字世慶少好學通涉經史頗有文才陰陽術數多所貫涉位至左衛將軍右光祿大夫

李業興上黨長子人博涉百家圖緯風角天文占候無不討練又長筭歷獨守閒居講肄經典二十餘年時人號為儒林先生後為齊文襄王中外府諮議參軍

信都芳好學善天文筭數甚為安豐王延明所知延明家有羣書欲抄集五經筭事為五經宗及古今樂事為樂書又取渾天歌器地動銅烏漏刻候風諸圖為器準並令芳筭之會延明南奔芳乃自撰注位中外府田曹參軍

劉芳為太子庶子芳才思深敏特精經義博聞強記兼
覽倉雅尤長音訓辨析無疑於是禮遇日隆賞賚豐渥
常爽字仕明河內人好學博聞強記明習候緯五經百
家多所研綜州郡禮命皆不就性好墳籍鳩集不足手
自補治躬加題帖其家所有垂將萬卷覽讀不息多有
異聞諸儒服其淵博至於學術精微當時莫及後為宣
威將軍

北齊權會字正理河間人也志尚沉雅動遵禮則少受

鄭易探賸索隱妙盡幽微詩書三禮文義該洽兼明風角妙識玄象位至國子博士

後周沈重字德厚吳興武康人學業該博為當世儒宗至於陰陽圖緯道經釋典靡不畢綜位至太常卿

柳敏字白澤性好學涉獵經史陰陽卜筮之術靡不習焉

盧光字景仁性溫謹博覽羣經精於三禮善陰陽解鍾律又好玄言位至陝州總管府長史

樊深既專經又讀諸史及倉雅篆籀陰陽卜筮之書位
至露門學博士下大夫

隋李德林幼聰敏該博墳典陰陽候緯無不通涉後至
懷州刺史

明克讓字宏道少儒雅善談論博涉書史所覽將萬卷
三禮禮論尤所精研龜筮歷象咸得其要位至通直散
騎常侍

房暉遠字崇儒恒山真定人也世傳儒學暉遠幼有志

治三禮春秋三傳詩書周易兼善圖緯位至國子博士
章鼎字起盛少通脫博涉經史明陰陽逆刺尤善相術
位至光州刺史

王頗性識甄明精力不倦好讀諸子徧記異書當代稱
為博物為漢王諒府諮議參軍

潘徽字伯彥吳郡人也性聰敏少受禮於鄭灼受毛詩
於施公受書於張冲講莊老於張機並通大義尤精三
史仕至西海郡威定縣主簿

劉焯以儒學知名專以教授著述為務孜孜不倦賈馬
王鄭所傳章句多所是非九章算術周髀七曜歷書十
餘部推步日月之經量度山海之術莫不覈其根本窮
其秘奧著稽極十卷歷書十卷五經述議並行於世位
至太學博士

劉炫少以聰敏見稱與王劭同脩國史俄直門下省兼
直內省考定羣言炫雖遍直三省竟不得官為縣司責
賦役炫自陳於內史送詣吏部尚書韋世康問其所能

炫自為狀曰周禮禮記毛詩尚書公羊左傳孝經論語
孔鄭王何服杜等注凡十三家雖義有精粗並堪講授
周易儀禮穀梁用功差少史子文集嘉言美事咸誦於
心天文律歷窮竅微妙至於公私文翰未嘗假手吏部
竟不詳試然在朝知名之士十餘人保明炫所陳不謬
於是拜殿內將軍

盧太翼河間人也閑居味道不求榮利博綜羣書爰及
佛道皆得其精微尤善占候筭歷之術初隱於白鹿山

後卒於雒陽

王貞字孝逸梁郡陳留人少聰敏好學善毛詩禮記左傳周易諸史百家無不畢覽後舉秀才授縣尉卒

馬光字榮伯武安人少好學從師數十年晝夜不息圖書讖緯莫不畢覽尤明三禮為儒者所宗位至太學博士

唐孔穎達初以教授為務尤明服氏傳鄭氏尚書王氏易毛詩禮記兼善筭曆博究羣言解屬文頗習政事位

至國子祭酒

薛登博涉文史每與人談論前代故事必廣引證驗有
如指掌位至泉州刺史

楊綰生而聰慧及長好學不倦博通經史九流七略諸
子諸集無不該覽位至中書侍郎平章事

徐岱蘇州嘉興人少好學六籍諸子悉所探究位至給
事中

王起自幼及耄手不釋卷天下之書無不該覽文宗曾

私撰數字以示之起曰臣書中所不識者唯八駿圖中三五字而已今此字臣未知出於何書文宗笑而竒之故待之如師友目曰當代仲尼位至山南東道節度使

多能

昔夫子以特聖之姿擅多能之譽蓋夫經藝之富數術之廣專之者易而兼之者難君子所不求備於人者良有旨也其有挺洽聞彊識之美稟聰明博達之智周覽圖傳兼通衆技至於觀天之象察地之理精和鵠之鍼

石辨夔牙之鍾呂極研桑之心計曉孫吳之兵法及至
圖畫卜筮篆籀草隸擊劔盤稍投壺奕碁或才至兼人
或品稱第一雖曰小道必有可觀借云異端豈有所害
自非英偉茂異亦曷能臻此馬

商瞿孔子弟子年長無子其母為取室孔子使之齊瞿
母請之孔子曰無憂瞿言四十後當有五丈夫子

五男也

已而果然

漢司馬相如少時好讀書學擊劔

擊劔者以劔搖擊而中之非斬刺也

為

文園令

劉向本名更生以父德任為輦郎擢為諫大夫宣帝時
更生以通達能屬文獻賦頌凡數十篇帝復興神僊方
術之事而淮南有枕中鴻寶苑秘書書言神仙使鬼物
為金之術及鄒衍重道延命方世人莫見而更生父德
武帝時治淮南獄得其書更生幼而讀誦以為竒獻之
言黃金可成帝令典尚方鑄作

馮奉世昭帝時為武安長學春秋涉大義讀兵法

後漢馬嚴妙擊劍習騎射後從平原楊太伯講學專心墳典能通春秋左氏仕郡督郵

桓譚父成帝時為太樂令譚以父任為郎因好音律善鼓琴博學多通徧習五經皆訓詁大義不為章句

蔡邕少博學好辭章數術天文妙操音律官至左中郎將

馬融高才博洽為世通儒又善鼓琴好吹笛桓帝時為南郡太守

陽球能擊劍習弓馬性嚴厲好申韓之學後為都尉

酈炎字文勝范陽人有文才解音律州郡辟命皆不就

皇甫嵩少有文武志介好詩書習弓馬後至太尉

魏王弼性和理樂遊晏解音律善投壺為尚書郎

蜀諸葛亮性長於巧思損益連弩木牛流馬皆出其意

推演兵法作八陣圖咸得其要位至丞相

譙周字允南研精六經尤善書札頗曉天文後為光祿

大夫魏封陽城亭侯

李仁字德賢博學伎藝算術卜數醫藥弓弩機械之巧
皆致思馬為州書佐尚書令史

吳王蕃字永元博覽多聞兼通術藝為散騎常侍

沈文字子正吳郡人弱冠博學多所貫綜善屬文辭兼
好武事注孫子兵法又辯於口每所至衆人皆默然莫
與為對咸言其筆之妙舌之妙刀之妙三者皆過絕於
人

晉傅玄少孤貧博學善屬文解鍾律後至司隸校尉

阮籍字嗣宗博覽羣籍尤好莊老嗜酒能嘯善彈琴為步兵校尉

嵇康學不師受博覽無不該通好老莊彈琴詠詩自足於懷拜中散大夫

王廣字世將少能屬文多所通涉工書畫善音樂射御博奕雜伎後為平南軍護南蠻校尉荊州刺史

郭璞好古文奇字妙於陰陽筭歷為著作佐郎

王裒字偉元城陽營陵人也氣辭雅正博學多能隱居

教授三徵七辟皆不就

索襲字偉祖燉煌人也虛靖好學不應州郡之命舉孝廉賢良皆以疾辭游思於陰陽之術著天文地理十餘篇多所啓發

戴逵字安道譙國人也少博學好談論善屬文能鼓琴工書畫其餘巧藝靡不畢綜後以太學博士散騎侍郎給事中徵不起

前秦王墮字安生博學有雄才明天文圖緯為苻洪司

馬

宋王懿字仲德少沉審有意略通陰陽解聲律為鎮北

將軍

劉敬宣字萬壽多伎藝弓馬音律無事不善為左衛將軍散騎常侍

張永涉獵書史能為文章善隸書曉音律騎射雜藝觸類兼善又有巧思益為太祖所知紙及墨皆自營造帝每得永表啓輒執玩咨嗟自歎供御者了不如也仕至

吏部尚書

孔琳之彊正有志力好文義解音律能彈碁妙善草隸
為祠部尚書

王微字景玄瑯琊臨沂人少好學無不通覽善屬文能
書畫兼解音律醫方陰陽術數官至中書侍郎

沈勃好為辭章善彈琴能圍碁為給事中

范曄少好學博涉經史善為文章能隸書曉音律為左
衛將軍太子詹事

劉休為桂陽王征北叅軍明帝頗有好尚尤嗜飲食休多藝能爰及鼎味問無不解

蕭思話涉獵書傳頗能隸書解音律便弓馬為侍中領前將軍

江湛愛好文義善彈碁鼓琴兼明算術為吏部尚書

南齊祖冲之解鍾律博塞當時獨絕莫能對者為長水校尉

柳世隆少立功名晚專以談義自業善彈琴世稱柳公

三為侍中衛將軍
三為侍中衛將軍
三為侍中衛將軍

杜栖吳郡錢塘人少從儒士劉歊受學善清談能彈琴
飲酒與父京產共隱居不仕

梁庾詵字彥寶新野人也幼聰警篤學經史百家無不
該綜緯候書射碁算機巧並一時之絕相東王召為鎮
西記室不就又徵中書侍郎不起

陶弘景字淵明丹陽秣陵人為奉朝請諸王侍讀讀書

萬餘卷善琴碁工草隸又性好著述尚竒異顧惜光景
老而彌篤尤明陰陽五行風角星筭山川地理方圖產
物醫術本草著帝王年歷又嘗造渾天象云修道所須
非止史官是用

張孝秀為建安王別駕博涉羣書精釋典善談論工隸
書凡諸藝能莫不明習

朱异既長涉獵文史兼通雜藝博奕書筭皆其所長年
二十八都詣尚書令沈約面試之因戲异曰卿年少何乃

不廉异逡巡未達其旨乃曰天下唯有文義棊書卿一時將去可謂不廉也後為中領軍

柳惲好學善尺牘學彈琴特窮其妙又工篇什及品定棊譜登格者二百七十八人第其優劣為棊品三卷惲為第二馬帝謂周舍曰吾聞君子不可求備至如柳惲可謂具美分其才藝足了十人惲著卜杖龜經性好醫術盡其精妙為吳興太守

江祿幼篤學有文章工書善琴為廬陵威王續驃騎諮

議叅軍

柳惔好學工製文尤曉音律為南安將軍湘州刺史

蕭駿善草隸工文章晚更習武膂力絕人與永安侯確相類為超武將軍封南安侯

陳蔡凝幼聰悟美容止既長博涉經傳有文詞尤工草隸為黃門侍郎

陳禹聰敏有識量涉獵經史解風角兵書頗屬文便騎射官至五府諮議

孫瑒少儻好謀略博涉經史尤便書翰為五兵尚書
吳明徹微涉書史經傳就汝南周弘正學天文孤虛遁
甲略通其妙官至南兗州刺史

侯安都工隸書能鼓琴涉獵書史為五言詩亦頗清靡
兼善騎射為邑里雄豪後為征南大將軍江州刺史

後魏古弼少忠謹好讀書又善騎射官至尚書令

李同軌學綜諸經多所治誦兼讀釋氏又好醫術官至
通直散騎常侍

裴詢字敬叔美儀貌多藝能音律博奕咸所開解起家
奉朝請

劉懋聰敏好學博綜經史善草隸書多識竒字為輕車
將軍

崔巨倫字孝宗幼孤及長涉獵經史有文章武藝仕光
祿大夫

王繇字茂道好學有文才尤善草隸又工摹畫為時人
所服仕至尚書郎

裴敬憲工草隸解音律為太學博士

北齊李元忠粗覽史書及陰陽術數解鼓箏兼好射彈
有巧思又善於方技官至侍中

李儉字德沉少聰敏有才藝音律博奕之屬多所通解
為尚書儀曹郎

祖珽字孝徵天性聰明事無難學凡諸技藝莫不措懷
文章之外又善音律解四夷語及陰陽占候醫藥之術
尤是所長文宣雖嫌其數犯憲法而愛其才技官至尚

書左僕射

祖孝隱孝徵之弟也有文學早知名詞章雖不逮兄亦
機警有口辯兼解音律位至通直散騎常侍

祖君信孝徵之子也涉獵書史多諳雜藝位至散騎常
侍

北周唐令則瑾之次子也性好篇章兼解音律文多輕
艷為時人所傳官至樂部下大夫

韓盛字文熾南陽堵陽人也幼有操行涉獵經史兼善

騎射膂力過人仕至新平郡守

蕭撫善草隸名亞於王褒筭數醫方咸亦留意所著詩賦雜文數萬言頗行於世官至少傅封蔡陽公

隋王誼字宜君少有大志便弓馬博覽羣言為大司徒封郢國公

令狐熙字長熙博覽羣書尤明三禮善騎射頗知音律起家以通經為吏部上士

宇文愷少有器局諸兄並以弓馬自達愷獨好學博覽

書記解屬文多伎藝為名公子累遷御正中大夫儀同三司

鄭譯字正義頗有學識兼知鍾律善騎射為上柱國

李敏幽州總管崇之子起家千牛美姿儀善騎射歌舞管弦無不通解為柱國

盧賁字子徵略涉書記頗解鍾律為太子左庶子

長孫熾字仲光性敏慧美姿儀頗涉羣書兼長武藝為

戶部尚書

長孫晟字季晟性通敏涉獵書史工彈善射矯勇過人
仕至淮陽太守右驍騎將軍

楊素少與天水牛弘同游好學研精不倦多所通涉善
屬文工草隸頗留意於風角為司徒

陳政字弘道太僕卿茂之子少養宮中美風儀有幹局
便弓馬解鍾律工文翰兼有口辯十七為太子千牛備
員

閻毗七歲襲封石保縣公及長好經史受漢書於蕭該

毗通大旨能篆書工草隸尤善畫為當時之妙周武帝見而悅之命尚清都公主入隋為將作少監

唐竇璡性寬厚工書解鍾律兼有巧思歷潁川南郡扶風太守

盧藏用善琴碁尤工篆隸為尚書右丞

王維為右丞有俊才博學多藝以詩名盛於開元天寶間書畫特臻其妙筆蹤措思參於造化

韓滉為右僕射平章事封晉國公滉尤工書善丹青以

繪事非急務自晦其能未嘗傳之好易象及春秋著春秋通例及天文事序議各一卷

李勉為太子太師善鼓琴好屬文詩妙知音律能自制琴又有巧思


李臯為江陵尹嘗運心巧思為戰艦挾二輪蹈之翔風鼓疾若掛帆席所造省易而久固又造歌器進入內中歸登有文學工草隸為工部尚書

蕭祐閒澹貞退善琴工書畫好五言詩嘗寄情於雲林

泉石之間故當時與之遊者皆名人清士卒為桂州觀察使

後唐李嚴幽州人本名讓坤仕燕為刺史涉獵書傳便弓馬多曲藝以功名自許後為客省使

晉李從昶秦王茂貞之第三子也為左龍武統軍少習華侈以逸遊燕樂為務而音律圖畫無不通之



冊府元龜卷七百八十六